

ջերմ, ամառային օրերում մարդ հեռուից նայում է Սալմաստայ պայծառ արեգակի ճառագայթներով լուսաւորուած հովտին, տեսնում է դաշտերը, մշակուած աշխատասեր ձեռքով, խոստանում են առատ հունձք. – տեսնում է՝ ցորեանը, գարին, բրինձը, բամբակը եւ ընդդէմների ամէն տեսակները, իրանց բեղմնաւորութեամբ ներկայացնում են խիստ գոհացուցիչ առատութիւն. տեսնում է՝ մրգաբեր այգիները լիացած են պտուղների ամենաազնիւ տեսակներով. – տեսնում է՝ խոտաւետ արօտամարգերի վրայ արածում են տաւարների նախիրներ եւ ոչխարների հօտեր, – մի խօսքով, նա տեսնում է, որ բնութիւնը անխնայ առատութեամբ թափել է այստեղ իր հարստութիւնները: Նա սկսում է մտածել. «որքան բախտաւոր ապրում են այստեղ մարդիկ»... Իսկ այդ ճոխութիւնները, բնութեան այդ պարգեւները չեն պատկանում այն բիւրաւոր աշխատող ձեռքերին, որոնք դաշտերի վրայ, արեւի կրակոտ բոցերի մէջ քրտինք են թափում:

Ահա գիւղերում, այստեղ եւ այնտեղ բարձրանում են ամբողջներ, որոնք իրանց հպարտ աշտարակներով եւ ատամնաւոր պարիսպներով իշխում են շրջակայքի վրայ, նրանց մէջ բնակւում են «աղաները» իրանց ախտերով եւ միջոցութիւններով, – ահա նրանց է պատկանում երկրի բոլոր բեղմնաւորութիւնը, նրանք են շոռայրում մշակ մարդու աշխատաւոր ձեռքի վաստակը:

Երեխայութեանս ժամանակ, երբ ես որեւիցէ անկարգութիւն էի անում, տատս եւ մայրս ամէն մէկը իր առանձին եղանակն ունէր ինձ սաստելու, որ վախենամ եւ հանգիստ կենամ: Տատս ասում էր. «սու՛ս, սու՛ս, մարդագեղը եկաւ, քեզ կը տամ կուտի»: – Մայրս ասում էր. «Ձեւդ կտրի՛, թէ չէ, ֆերրաշին կը կանչեն»... Թէ առաջին եւ թէ վերջին սպառնալիքը իմ վրայ միօրինակ ազդեցութիւն էին գործում. ես ֆերրաշից նոյնքան էի վախենում, որքան գայլից: Բայց երբ փոքր-ինչ մեծացայ, մարդագայլից այլեւս չէի վախենում, որովհետեւ հասկանում էի, թէ մարդը գայլ չի դառնայ, բայց ֆերրաշի երկիւղը երբեք դուրս չեկաւ իմ սրտից... Ինձ թւում է, որ այս րոպէիս էլ լսում եմ նրա մտրակի ձայնը ինձ թւում է, թէ իմ ականջին զարկում են գիւղացու ցաւալի հառաչանքները, եւ ես տեսնում եմ նրան թուլացած, ուշաթափ եղած հարկապահանջի անգուր զանահարութիւնից...

Քեռուս տունը, ուր տեղափոխուեցանք մենք, մեզ հասած դժբախտութիւնից յետոյ, գտնւում էր Բօհնայ-Շահարում: Բօհնայ-Շահար նշանակում է հին քաղաք. այսպէս կոչում էին նրան Սալմաստայ նոր քաղաքից որոշելու համար, որի անունը Դիլիման էր: Յին քաղաքը կորցրել էր իր անունը: Շատ հաւանական է, որ դա լինէր մեր Չարեհաւանը կամ Չարեւանդը, որի անունով մի ժամանակ կոչւում էր ամբողջ գաւառը: